



Ženska mreža BiH

## Saopštenje za javnost

### Zašto smo nevidljive, neprisutne i neupitane svaki put kada se o našim životima diskutuje i odlučuje, dok se dužine naših suknji svakodnevno slobodno mjere i komentarišu?

Ženska mreža Bosne i Hercegovine, u povodu 25. Novembra - Međunarodnog dana borbe protiv nasilja nad ženama, i početka globalne kampanje 16. Dana aktivizma protiv rodno uslovljenog nasilja, poziva građanke i građane BiH da se priključe našim naporima u podizanju svijesti protiv diskriminacije i nasilja nad ženama u BiH jer je život bez nasilja pravo i odgovornost svih nas!

U potpunosti smo svjesne da se o ženama sa invaliditetom, ženama treće dobi, ženama iz ruralnih sredinama, samostalnim roditeljicama, ženama nacionalnih manjina, nezaposlenim ženama, ženama sportistkinjama, ženama umjetnicama, ženama naučnicama, ženama oboljelim od teških i neizlječivih oboljenja, lezbejkama, biseksualnim i trans\* (LBT\*) ženama, ženama žrtvama ratnog nasilja i rodno uvjetovanog nasilja, djevojčicama, kao i drugim društveno marginaliziranim ženama - ne govori, jer su nevidljive, a nevidljivim ih čini samo društvo ignorišući njihovo postojanje i ne pružajući odgovore na njihove potrebe i identitete.

Žena nema u mirovnim i pregovorima o ustavnim reformama, u reformskim agendama, u pregovorima sa Svjetskom bankom, Evropskom unijom, u zakonodavnim tijelima nas je tek 20tak%, na mjestima na kojima se odlučuje - nema nas ni toliko.

Naša tijela su i dalje predmet objektivizacije i seksualizacije, naša seksualno - reproduktivna prava upitna, a naš najviši pravni akt, Ustav BiH iz kojeg proizilaze svi drugi pravni akti, ne prepoznaje žene i ne garantiraju rodnu ravnopravnost.

Kada smo žrtve teških oblika fizičkog nasilja - društvo ne reaguje - jer je u BiH ustaljena praksa da se ne reaguje u pojedinačnim slučajevima.

Koliko djevojčica treba biti silovano da bi se oglasio sami vrh naše države i prepoznao da je rodno uvjetovano nasilje duboko ukorijenjeno u sve pore našeg društva?

Koliko pretučenih žena treba da se nabroji kako finansiranje sigurnih kuća ne bi bilo problematično - već sistemski i trajno riješeno?

Koliko žena treba da bude ubijeno od strane svojih partnera pa da se pooštiri kaznena politika za nasilje u porodici i partnerskim vezama?

Koliko to siromašne treba da budemo da bismo ostvarile pristup pravdi i pravo na besplatnu pravnu pomoć kada smo ugrožene u svojim porodicama, na ulici, u institucijama od kojih očekujemo pomoć i podršku?

Koliko samohranih majki treba da traži humanitarnu pomoć kako bi prehranile svoju djecu - da bi sistem shvatio da naplata izdržavanja djece ne funkcioniše na dobrovoljnoj osnovi?

Koliko žena u kolicima treba da bude zatvoreno u kući jer su rampe za prilaz trotoarima, zgradama i institucijama naučno fantastični pojam?

Koliko kilometara treba da pređe djevojčica do škole, ili trudna žena do zdravstvene ustanove - kako bi se vlastodršci sjetili da nemaju svi privatne i službene automobile i da nam je javni gradski, prigradski i međugradski saobraćaj ravan ništici? Koliko hektolitara vode treba da uvezemo i kupimo kako bismo shvatili da se BiH suočava sa teškim nedostatkom pitke vode - ne samo u Sarajevu - već i u većini ruralnih područja u BiH?

Zašto u manjim sredinama ne postoje društveni centri u kojima bi ženske grupe mogle djelovati i pružati podršku ženama u svojim zajednicama, ili zašto su ti društveni centri izdati kockarnicama na korištenje? Zašto smo žene samo ako smo udate i ako smo majke - na osnovu kojih normi nam društvo ima pravo nametati obrasce ponašanja?

Kako je moguća činjenica da je trećina žene koje su se porodile u 2014.g. ostala bez porodijske naknade nije alarmantna?

Ženska mreža BiH i njenih 47 organizacija članica, sa područja cijele Bosne i Hercegovine, pojedinke i pojedinci koji su se opredjelili u borbi protiv nasilja nad ženama i djevojčicama pozivaju nadležne vlasti u BiH da učine svoj maksimum u provedbi Zakona o ravnopravnosti spolova BiH, CEDAW i CAHVIO konvencije.

**Naš cilj je NITI JEDNA ŽENA NEVIDLJIVA!**

Život bez nasilja i diskriminacije je pravo i obaveza svih nas!

Ženska mreža BiH

Sarajevo, 24/11/2015  
Br: 376/11